

# Filemon

**JANDIKO:** Jaote Paulo

**KAR NDIKO:** Rumi

**KINDE NDIKO:** 60 E YIK RUOTH(AD)

## Gik Manie Iye

Barua nondiko ni Filemon Ja-kristo modak Kolosai. Filemon ne nigi misumba miluongo ni Onesimo mane oyudo okwale aye oringo, mani ne en richo mane nyalo miyo oneg Onesimo. Kata kamano Onesimo noromo kod Paulo mane oloke mobedo Jakristo. Bang yie ne ogombo mondo odog ir Ruodhe Filemon. Omiyo Paulo nondiko ne Filemon mondo oyie kaka Jakristo okaw Onesimo makoro bende noselopkore obedo Jakristo. Paulo nondiko gi chuny mar hera ka onyiso Filemon hera manie kind Jokristo kaka owete kuom Ruoth. Ne okwaye ni oyie ong'uonne Onesimo kuom ketho mane osetimo ne kendo oruake kaka owadgi e nying Kristo.

## WECHE MOCHAN KAE GIN;

1. Mos (1-3)
2. Goyo erokamano kod lamo (4-7)
3. Kwayo mar Paulo ni Onesimo kuom Filemon (8-21)
4. Kwayo mogik, mos kod lamo (22-25)

<sup>1</sup>An Paulo ng'at motue nikech Kristo Yesu kod Timotheo owadwa, ne in osiepwa ma wageno kendo jatich wadwa Filemon, <sup>2</sup>kaachiel gi nyamin-wa Afia gi Arkipo jalweny wadwa, kod Kanisa malemo e odi.

<sup>3</sup>Ng'wono kod kuwe moa kuom Nyasaye Wuonwa kod Ruoth Yesu Kristo obed kodu.

## Erokamano Kod Lamo

<sup>4</sup>Agoyo ni Nyasacha erokamano pile ka aluongo nyingi e lemona, <sup>5</sup>nikech awinjo kuom yie ma in-go kuom Ruoth Yesu, kendo kuom hera miherogo jomaler duto. <sup>6</sup>Alemoni ni mondo iland yie ma in-go motegno, mondo eka ibed gi ng'eyo matut kuom gik mabeyo duto ma wan-go ei Kristo. <sup>7</sup>Hera ma in-go osemiya mor maduong' kendo osejiwa, nikech in, owadwa mahero, iseduogo chunje jomaler .

## Paulo Kwayo Ne Onesimo

<sup>8</sup>Kuom mano, kata obedo ni kuom Kristo ne anyalo bedo gi chir mar chiki mondo itim gima onego itim, <sup>9</sup>to koro asayi mondo itim kamano nikech hera. Koro an Paulo awuon, jaduong' moti, kendo motue nikech wach Kristo Yesu, <sup>10</sup>akwayi kuom wach wuoda Onesimo mane odoko wuoda ka an e twech. <sup>11</sup>Onesimo yandi chon onge ohala kuomi to sani koro okelo konyruok maduong' ne in kaachiel kod an bende.

<sup>12</sup>Aduoge iri kendo, kata obedo ni chunya ogene ahinya. <sup>13</sup>Dahero bedo kode ka mondo okonya kari ka pod otueya gi nyororo nikech Wach Maber.

<sup>14</sup>To ne ok adwar timo kode gimoro amora ka ok in ema iyie, mondo tim ng'wono moro amora mitimo kik bed gima ochun, to obed gima itimo nikech ihero. <sup>15</sup>Nyalo bet ni Onesimo nowuok iri kuom kinde machwok mondo eka

iyud thuolo mar kawe chuth bang'e,  
<sup>16</sup>ok kaka misumba to kaka owadu  
 migeno ma en ng'at moloyo misumba.  
 En ohala ne an, to ang'eyo ni en ohala  
 moloyo ne in bende, ok mana kaka  
 ng'ato ang'ata, to kaka owadu kuom  
 Ruoth.

<sup>17</sup>Omiyo ka inyalo kwana kaka ng'a-  
 ma ni kodi e achiel to rwake mana kaka  
 dirwaka. <sup>18</sup>Kapo ni osetimoni marach,  
 kata ka en-gi gopi moro to kwan-gi e  
 wiya. <sup>19</sup>Andikoni baruani gi lweta  
 awuon an Paulo, ka anyisi ni abiro  
 chuli, kata ka ok aparoni in kod gopa  
 ma en ngimani owuon. <sup>20</sup>Gima agombo  
 maduong', owadwa, en ni mondo iyie

itimna ng'wono kuom Ruoth, kiduogo  
 chunya kuom Kristo. <sup>21</sup>Nikech ang'eyo  
 maber ni iwinjo wach, andikoni ka an  
 gadiera ni ibiro timona maber moloyo  
 kaka akwayi.

<sup>22</sup>Kwayo machielo ma an-go en ni  
 mondo ilosna kar nindo, nikech an-gi  
 geno ni ibiro gonya mana kaka usebedo  
 kulamo.

<sup>23</sup>Epafras motue koda kaachiel  
 nikech wach Kristo Yesu ooronu mos.  
<sup>24</sup>Mariko bende omosou kaachiel gi  
 Aristako gi Demas kod Luka, ma gin  
 jotich wetena.

<sup>25</sup>Ng'wono mar Ruoth Yesu Kristo  
 mondo obed kod chunyi.